

Kalaallisut oqaatsigut pillugit oqallinnermut atatillugu ilanngukkusutaq.

Kalaallit Nunaanni Namminersorneq pillugu inatsimmi, ”§ 20. *Kalaallit oqaasii tassaapput Kalaallit Nunaanni pisortatigoortumik oqaatsit*”.

Taamaattumik qqaatsigut inuiaqatigiittut aaqqissuussaanitsini inuttaasunik sullissinerni atortariaqarpagut.

Tassaa oqaatsigut Kalaallit Nunaanni oqaatsit pingaarnertut inissisimapput taamalu inuiaqatigiinni, sulinitinni, ilinniartitaanitsinni, qinikkat sulinerini, inuiaqatigiittut aaqqissuussaanitsini suliniutinik saqqummiussinerni il.il. *pingaarnertut atorneqartussat*.

Ullumikkut kalaallit oqaatsitsinnik atuinerput pimoorunnerusariaqalerparput, kingusinaartinnata.

Taama oqarninni eqqarsaatigaara illoqarfinni annerni, pisortat suliffeqarfiutaanni, ilinniagaqarfinni, inuttaasunik ammasumik ataatsimiititsisarnerni assigiinngitsuni, il.il. oqaatsitta kisimiillutik atorneqartannginerat.

Tamatumani aallaaviusut arlaqartut taagorsinnaagaluarpagut, taamaattorli oqaatsitsinnik atuinngippallaarnitsinnut pissutaanerpaq tassaagunarpoq nunasiaataanerup ukiut 50-it sinnerlugit qaangiutereeraluartup, sunniutigisaasa suli atuagaaneri.

Maannakkut namminersornermut ikaarsaareerpugut tamannalu inatsisitigut pisussaaffiliineruvoq, tassa uagut nammineq oqaatsigut atorlugit nunatsinnik ineriartortitseqqinnissatsinnik. Nukipparujussuit piffissarlu sivisooq atoreerlugu namminersorneq eqqunneqarpoq aamma namminersulerpugut uagut nammineq nunatsinnik ineriartortitsissagatta avataaneersunit allanit aqqunerata.

Ukiut 300-ut missaanni nunaasiaataasimaneq qaangertariaqalerparput tamannami 1953-imi inatsisitigut qaangiuttutut oqaatigineqareerpoq, taamaattorli suli kinguneri atorpagut ilaatigut oqaatsinut allanut qilersugaasimasutut pissusilersornitsigut.

Eqqaamassavarput 1978-imi tassalu ukiut 32-it matuma siornatigulli, inatsimmi allassimammat, *“Kalaallit oqaasii pingaarnersaallutik oqaasiupput. – Danskit oqaasii peqqissaartumik ilinniartitsissutigineqassapput.*

Imm. 2. Oqaatsit taakku tamarmik pisortaqarfimmi atorneqarsinnaapput.”

Taamaattumik alloriarnermut tulliuttumut ikaarsaartariaqarpugut, taamaaliussaagullu oqaatsitta kinaassutsitsinnik ilisarnaatitta inuiaqatigiinni kalaallini atugaanerulernerannik piviusunnngortitsinitsigut. –

Tamanna inatsimmik tunngaveqarluta pisuussaaffigaarput aamma pisinnaatitaaffigaarput, soorlu uani:

“Nunat inoqqaavisa pisinnaatitaaffi pillugit Naalagaaffit peqatigiit Nalunaarutaanni, immikkoortoq 13:

*“Nunat inoqqaavi **pisinnaatitaapput** namminneq **ingerlaatsisik oqaatsisik**, oqaluttuatigut kingornussatik, inuunermik isiginnitaatsisik, allattaatsisik aamma oqaluttualiornikkut taalliornikkullu pigisatik uummarissassallugit, atussallugit aamma kinguaariit tullissaannut ingerlateqqissallugit, aamma namminneq inuiaqatigiiffimminnut, sumiiffinnut aamma inunnut aterititatik piginnassallugit”.*

Taamaattumik naammattunik tunngavissaqarpugut aamma tamakku atorluartariaqarpagut, tassa sakkussatsinnik naammattunik peqareerpugut, oqaatsitta nunatsinni pisortatigoortumik oqaasiunerannik pivisunngortitsinissatsinnut.

Oqaatsigummi tassaapput inuiaqatigiittut ataatsimoorussagut kinaassutsitsinnik ersersitsisut taamaattumillu avataaniit tatineqarnitsinnut illersuutissagut pingaarnepaat.

Neriullunga oqaatsigut pillugit oqallinneq torersumik piviusorsiortunillu tunngaveqarluni ingerlaqqissasoq.

Arqaluartâ Rosing
kalaaleq nuummiu